

VENDIM
Nr. 92, datë 4.7.2017

**PËR FILLIMIN E PROCEDURAVE PËR MIRATIMIN E PLANIT TË INVESTIMEVE
PËR VITIN 2017, PËR KESH SHA**

Në mbështetje të nenit 16; nenit 20, pika “e”, nenit 109, pika 5; nenit 110, pika 2 të ligjit nr. 43/2015 “Për sektorin e energjisë elektrike”, si dhe në zbatim të VKM-së nr. 244, datë 30.3.2016, “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”; gjithashtu dhe nenit 14 dhe neni 15 të “Rregullores për organizimin, funksionimin dhe procedurat e ERE-s”, miratuar me vendimin nr. 96, datë 17.6.2016; neneve 8; 11; 12; 13 të “Rregullores për procedurat e paraqitjes dhe miratimit të planit të investimeve nga të licencuarit në sektorin e energjisë elektrike”, miratuar me vendimin nr. 62, datë 15.9.2009; Bordi i Entit Rregullator të Energjisë (ERE), në mbledhjen e tij të datës 4.7.2017, mbasi shqyrtoi relacionin për fillimin e procedurës për miratimin e planit të investimeve për vitin 2017, për shoqërinë KESH sh.a., të përgatitur nga grupi i punës,

konstatoi se:

- Me anë të shkresave nr 773 Prot, datë 3.11.2016, dhe nr. 276 Prot. datë 30.3.2017, në zbatim të nenit 10 të VKM-së nr. 244, datë 30.3.2016, “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”, është kërkuar nga ERE paraqitja për miratim e planit të investimeve të shoqërisë KESH sh.a. për vitin 2017 sipas kërkesave të parashikuara në aktet ligjore e nënligjore në fuqi.

- Grupi i punës, i ngritur me urdhër të kryetarit të ERE-s nr. 25, datë 11.5.2017, duke mbajtur në konsideratë shkresën nr. 635/5, datë 27.2.2017, të shoqërisë KESH sh.a., me të cilën është dërguar në ERE plani i investimeve të KESH sh.a. së bashku me shkresën nr. 578/1 Prot, datë 2.2.2017, të Ministrisë së Energjisë dhe Industrisë, me të cilën kjo e fundit është shprehur për “Miratimin e programit ekonomiko-financiar të KESH sh.a., për vitet 2017 - 2021”, mori në shqyrtim tabelën e “Planit të investimeve për shoqërinë KESH sh.a. për vitin 2017”.

- Gjatë shqyrtimit të këtij informacioni, grupi i punës konstatoi se ky informacion plotësonte një pjesë të kërkesave të përcaktuara në “Rregulloren për procedurat e paraqitjes dhe miratimit të planit të investimeve nga të licencuarit në sektorin e energjisë elektrike”, të miratuar me vendimin e ERE-s, nr. 62, datë 15.9.2009.

1. Edhe pas kërkesave të përsëritura nga ana e ERE-s është konstatuar paraqitje jo e plotë e dokumentacionit, sipas kërkesave të përcaktuara në nenin 11, pika 2 të “Rregullores për procedurat e paraqitjes dhe miratimit të planit të investimeve nga të licencuarit në sektorin e energjisë elektrike”.

2. Vërehen mangësi dhe në:

a) raportin lidhur me zbatimin e planit të vitit paraardhës (neni 7, pika 3);
b) relacionin shpjegues për investimet e planifikuara (neni 7, pika 1);
c) paraqitjen e kërkesave të nenit 8 (Plani i investimeve për të licencuarit në veprimtarinë e prodhimit të energjisë elektrike).

3. Investimet janë paraqitur kryesisht me nocion buxhetimi e pak teknik.

4. Koha e paraqitjes e pamjaftueshme për një analizim teknik.

5. Nevoja për saktësim të planit pas vendimit lidhur me tarifat 2017.

6. Nevoja për saktësimin e dokumentacionit sipas procedurave.

7. Nevoja për miratimin e një plani investimesh fisibel.

Për gjithë sa më sipër, bordi i ERE-s

VENDOSI:

1. Të fillojë procedurat për miratimin e “Planit të investimeve për kompaninë KESH sh.a., për vitin 2017”.

2. Drejtoria Juridike dhe Mbrojtjes së Konsumatorëve të njoftojë aplikuesin për vendimin e bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

Ky vendim mund të ankimohet në Gjykatën Administrative Tiranë, brenda 30 ditëve kalendarike nga botimi në Fletoren Zyrtare.

KRYETARI
Petrit Ahmeti